

Bādshāhī ke Chār Usūl



bādshāhī ke chār usūl

Four Principles of the Kingdom

by Bakhtullah

[Ao, Khud Dekh Lo 12]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of Pexels <https://pixabay.com/photos/abstract-backdrop-background-1850416/>;

Rev. H. Martin

<https://freebibleimages.org/illustrations/hm-feeding-5000/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Bhāichārā	4
Kamī se Kasrat	5
Siyāsat Band	7
Tūfān meñ Hifāzat	10
Injīl, Yūhannā 6:1-21	12

Jab Īsā Masīh ḵhushḵhabrī sunāne lagā to wuh hameshā anginat logoñ se ghirā rahtā thā. Aur kyā ajab. Uskī bāteñ anokhī thīñ, us ke mojize dekhkar log hakkā-bakkā rah jāte the.

► *Jald hī sawāl uṭhā ki kyā yih wuh nahīñ hai jo āne wālā hai? Kyā yih wuh nahīñ hai jo dushman ko mulk se nikālegā?*

Ḷhudāwand Īsā un kī soch-bichār jāntā thā. Beshak wuh bādshāh thā. Lekin uskī bādshāhī is duniyā kī nahīñ thī. Use siyāsī bātoñ se saḵht nafrat thī.

► *Lekin agar use siyāsī bāteñ pasand nahīñ thīñ to wuh kis qism kī bādshāhī lānā chāhtā thā?*

Iskā jawāb jald hī patā chalegā.

Ek din Īsā Masīh apne shāgirdoñ ke sāth kashtī meñ baiṭh gayā. Us ne unheñ hidāyat dī ki jhīl ko

pār karo. Kyoñki k̄hidmat karte karte sab ko ārām kī saḁht zarūrat thī. Kināre par pahuñchkar wuh qarīb ke pahār par chaḁh gae.

Shāgirdoñ ne sukūn kī sāñs lī. Wāh! Itne shor-sharābā ke bād yih kitnī pursukūn jagah thī! Koī ābādī nahīñ thī, bilkul wīrān jagah thī. Koī nahīñ thā jo unheñ apne sawāloñ aur minnatoñ se tang kare.

Magar yih kyā thā? Achānak do-chār log dūr se āte hue dikhāī die. Chalo, koī bāt nahīñ. Ek yā do logoñ ko patā chalā hogā ki ham yahāñ āe haiñ. Yih sochkar shāgirdoñ ko kuchh tasallī huī. Lekin phir wuh chaunk uḁhe. Pūre kā pūrā sailāb un par ṭuṭ parā. Jald hī jagah kī shānti kāfūr ho gaī.

► *Kyā huā thā?*

Logoñ ne andāzā lagāyā thā ki kashtī kis taraf chal rahī hai. Tab wuh paidal se jhīl ke kināre chalte hue un ke pīchhe ho lie the. Ab wuh pahuñch gae.

► *Kyā Īsā Masīh ne unheñ bhagāyā? Yā kyā wuh dubārā kashtī meñ baiṭhkar chalā gayā?*

Nahīñ. Wuh baiṭhkar unheñ Ḳhudā kā kalām sikhāne lagā.

► *Kyon?*

Use un par tars āyā. Ḳhudāwand Īsā ko hameshā ham par tars ātā hai. Use patā hai ki ham us ke baḡhair āwārā bheṛeñ haiñ. Ki hamen achchhe charwāhe kī saḡht zarūrat hai.

Hote hote 5000 mard pahuñch gae. Sirf mardoñ kā zikr hai. Un ke bāl-bachche bhī kāfī tādād meñ sāth āe hoñge. Ho saktā hai ki mil-milākar bīs hazār tak the.

Jald hī ek maslā mālūm huā. Log itne josh se Īsā Masīh ke pīchhe bhāg āe the ki un ke pās khānā nahīñ thā.

Ḳhudāwand Īsā har ek kī fikr kartā hai. Un kī thakī-hārī hālat dekhkar us ne apne shāgird Filippus se pūchhā, “Ham kahān se khānā ḡharīden tākī unheñ khilāeñ?”

Us ko mālūm thā ki kyā karegā. To bhī us ne pūchhā.

► *Kyon?*

Wuh shāgirdon ko apnī bādshāhī ke bāre mein kuchh sikhānā chāhtā thā.

► *Kyā sikhānā chāhtā thā?*

Yih ki is bādshāhī ke kuchh anmiṭ usūl hote haiñ. Pahlā usūl,

Bhāichārā

► *Kyā Īsā Masīh ne Filippus se islie bāt kī ki wuh khāne kā intazām karwāe?*

Nahīñ. Wuh chāhtā thā ki Filippus ḳhud soch le ki kyā karnā hai. Ki khānā kahāñ se āegā. Jagah to wīrān thī. Ābādī thī hī nahīñ jahāñ se khānā mile.

Bhāichārā is se shurū hotā hai ki ham dūsron kī fikr karen. Ḳhudāwand Īsā chāhtā hai ki ham ek dūsre kī is tarah fikr karen jis tarah wuh kartā hai. Ab Filippus sachmuch fikr karne lagā. Us ne logon kī tādād ginkar jawāb diyā, “Agar har ek ko sirf

thoṛā-sā mile to bhī chāndī ke 200 sikke kāfī nahīn hoṅge.”

Mazdūr ko din meñ chāndī kā ek sikkā miltā thā. 200 din meñ wuh itne paise kamā saktā thā ki in logoñ ko thoṛā-bahut mil jāe.

Ab dūsre shāgird bhī fikrmand hue. Wuh patā karne lage ki kyā kisī ke pās khānā hai? Magar kisī ke pās khānā na thā. Āḡhirkār ek shāgird banām Andriyās āyā aur kahā, “Yahāñ ek laṛkā hai jis ke pās jau kī pāñch roṭiyāñ aur do machhliyāñ haiñ. Magar itne logoñ meñ yih kyā haiñ!”

Bhāichāre kī jhalak.

Āsmān kī bādshāhī kā dūsra usūl,

Kamī se Kasrat

Ḳhudāwand Īsā kā pūchhne kā maqsad pūrā ho gayā thā. Shāgirdoñ meñ fikrmandī kī rūh ā gai thī. Ab Īsā Masīh ek aur bāt sikhānā chāhtā hai.

► *Wuh kyā hai?*

Yih ki āsmān kī bādshāhī meñ kamī kasrat meñ badal jātī hai. Aisī kasrat jo sab ke lie kāfī ho.

Us ne farmāyā, “Logoñ ko biṭhā do.”

Sab ko biṭhā diyā gayā to Īsā Masīh ne shukrguzārī kī duā kī. Phir us ne roṭī aur machhliyoñ ke ṭukre ṭukre karke unheñ shāgirdoñ ke supurd kie. Shāgird yih ṭukre bāñṭne meñ juṭ gae. Lekin yih kyā thā? Shāgird taqsīm karte gae magar khānā khatm na huā. Log na sirf jī bharkar khā sake balki khānā bach bhī gayā. Bache hue khāne ke 12 ṭokre bhar gae—har shāgird ke lie ek.

Jis larke ne khānā diyā thā us ke pās thoṛā hī thā. Lekin Īsā Masīh ne yih lekar kasrat kā khānā muhaiyā kiyā. Jo thoṛā-bahut hamāre pās hai Kḥudāwand use itnā baṛhā saktā hai ki sab ser ho jāeñ.

Larḳā yih bhī kah saktā thā ki mujhe chhoṛ do. Yih bas mere lie kāfī hai. Maiñ apnā khānā kḥud khāūngā. Lekin jab us ne apnī nemat Kḥudāwand ke supurd kī to be-shumār logoñ ko barkat milī.

Āsmān kī bādshāhī meñ jab ham apnā thoṛā-bahut māl Īsā Masīh ko sauñp deñ to sab ko barkat miltī hai. Tab kamī kasrat meñ badal jātī hai.

► *Kyā āp chāhte haiñ ki Īsā Masīh āp kī kamī ko kasrat meñ badal de?*

Phir use Īsā Masīh ke supurd karen.

Āsmān kī bādshāhī kā tīsrā usūl,

Siyāsat Band

Jahāñ āsmān kī bādshāhī hotī hai wahāñ siyāsat band ho jātī hai.

Jab logoñ ne yih mojizā dekhā to wuh ek dūsre se phusphusāne lage.

► *Kyā phusphusāne lage?*

Yih ki “Yaqīnan yih wuhī nabī hai jise duniyā meñ ānā thā.”

► *Kyā matlab? Kaun-sā nabī?*

Mūsā nabī ne peshgoī kī thī ki ek waqt āegā jab

Rab terā Ҡhudā tere wāste tere bhāiyon̄ meñ se mujh jaise nabī ko barpā karegā. (Tauret, Istisnā 18:15)

Log samajh gae ki Īsā Masīh yahī nabī hai. Ki wuh āne wālā al-Masīh hai. Ki yih hamārā bādshāh banegā. Mojize ko dekhkar wuh itne josh meñ āe ki wahīn̄ ke wahīn̄ use bādshāh banānā chāhte the. Āp Ҡhud andāzā lagāen̄: 5000 mard kyā kuchh nahīn̄ kar pāte jab wuh milkar kām karen̄. Sāth aisā bādshāh ho.

Lekin Ҡhudāwand Īsā ko mālūm huā ki wuh ākar use zabardastī bādshāh banānā chāhte haiñ.

► *Kyā us ne un kī izzat-o-ehtarām qabūl kī?*

Nahīn̄. Us ko un kī is soch se nafrat thī. Log bas siyāsī soch rakhte the. Wuh us se duniyāwī fāydā uṭhānā chāhte the. Lekin Īsā Masīh is duniyā kī ām bādshāhī qāym karne nahīn̄ āyā thā. Wuh āsmān kī bādshāhī lāne ko āyā thā.

► *Āsmān kī yih bādshāhī kyā hai?*

Yih ek rūhānī, ek andarūnī bādshāhī hai. Yih bādshāhī dilon meñ rāj kartī hai. Yih saḡht aur siyāsī dilon ko narm karnā chāhtī hai—Ḳhudā kī bāton ke lie narm, ek dūsre ke lie narm. Yih hameñ āsmān ke shahrī banānā chāhtī hai.

► *Ḳhudāwand Īsā ne kyā kiyā jab log yon sochne lage?*

Wuh ekdam un se alag hokar akelā hī pahār par chaḡh gayā.

Āj bhī bahut-se log Īsā Masīh ko apne kāmon ke lie istemāl karnā chāhte haiñ. Wuh use apnā bādshāh banākar duniyāwī fāydā uṡhānā chāhte haiñ. Yon wuh bādshāh ko ḡhulām banānā chāhte haiñ. Lekin yaqīn karo: Jab log Ḳhudāwand ko apne maḡsadoñ ke lie istemāl karnā chāhte haiñ tab wuh ojhal ho jātā hai. Wuh sirf us waqt hāzir hotā hai jab hamāre dil us ke rūhānī kām ke lie khule hon. Jab ham mān jāeñ ki wuh āsmān kā bādshāh hai.

► *Shāgirdon ke sāth kyā huā?*

Ḳhudāwand Īsā ne unheñ ekdam kashtī meñ
biṭhākar jhīl ke pār bhej diyā.

► *Kyon?*

Islie ki wuh bhī siyāsī bātoñ meñ ulajh na jāeñ.
Āsmān kī bādshāhī kā chauthā usūl,

Tūfān meñ Hifāzat

Andherā chhā gayā aur Īsā Masīh ab tak pahār par
thā. Ekdam tez hawā kashtī par ṭuṭ paṛī. Baṛī
baṛī lahreñ kashtī se ṭakrāne lagīñ. Kashtī chhoṭe
khilaune kī tarah idhar-udhar ḍagmagāne lagī. Yih
dehkar shāgird kashtī ko jald-az-jald agle kināre
tak le jāne meñ juṭ gae. Kashtī ko khete khete
wuh chār yā pāñch kilometer kā safr tay kar chuke
the ki achānak chīkh uṭhe. Andhere meñ ek shakl
pānī par chaltī huī nazar āī.

► *Kyā yih koī bhūt thā jo un ko barbād karne ā rahā
thā?*

Wuh dahshat se pānī pānī ho gae.

Tab Ḳhudāwand Īsā kī āwāz sunāī dī, “Maiñ hī hūñ.
Ḳhauf na karo.”

► *Kyā ho rahā thā?*

Wuh pānī par chalte hue un ke pās ā rahā thā. Wuh pānī par yoñ chal rahā thā jis tarah ham ṭhos zamīn par chalte haiñ. Kabhī wuh pānī ke pahāron par chaṛhtā nazar ātā kabhī pānī kī wādiyon meñ ojhal ho jātā thā. Āḥhirkār wuh kashtī ke pās pahuñch gayā. Shāgird use kashtī meñ biṭhāne ko the ki kashtī us jagah pahuñch gaī jahāñ wuh jānā chāhte the.

Yih kaisī bāt hai. Log Īsā Masīh ko bādshāh banānā chāhte the jabki use pānī aur hawā par pūrā iḡhtiyār thā. Islie āo, ham us par imān rakheñ tāki rozmarā kī zindagī meñ uskī hifāzat pāeñ. Jab tūfān ham par ṭuṭ pāre to ham madad ke lie use pukāreñ. Jab pānī ke pahār ham se ṭakrāeñ to uskī qurbat meñ mahfūz raheñ.

► *Yoñ shāgirdon ne ek hī din meñ bahut kuchh sīkh liyā thā:*

Bhāichārā. Āsmān kī bādshāhī meñ ham sab bhāi-bahn haiñ. Jis tarah Īsā Masīh hamārī fikr

kartā hai usī tarah hamen ek dūsre kī fikr karnī hai.

Kamī se Kasrat. Is bādshāhī men jo thoṛā-bahut mere pās hai wuh sab ke lie barkat kā bāis ban jātā hai.

Siyāsat Band. Jahān āsmān kī bādshāhī hai wahān siyāsat band ho jātī hai.

Tūfān men Hifāzat. Hamāre āqā ko hawā aur pānī par iḳhtiyār hai. Islie jab zindagī ke tūfān hamen jhakjhorthe haiñ to hamen usī ke qadamon men hifāzat miltī hai.

Injil, Yūhannā 6:1-21

Is ke bād Īsā ne Galīl kī jhīl ko pār kiyā. (Jhīl kā dūsra nām Tibariyās thā.) Ek baṛā hujūm us ke pīchhe lag gayā thā, kyonki us ne ilāhī nishān dikhākar marīzoñ ko shafā dī thī aur logoñ ne iskā mushāhadā kiyā thā. Phir Īsā pahār par chaṛhkar apne shāgirdon ke sāth baiṭh gayā.

(Yahūdī Īd-e-Fasah qarīb ā gaī thī.) Wahān baiṭhe Īsā ne apnī nazar uṭhāi to dekhā ki ek baṛā hujūm pahuñch rahā hai. Us ne Filippus se pūchhā, “Ham kahān se khānā ḡharīden tāki unheñ khilāen?” (Yih us ne Filippus ko āzmāne ke lie kahā. Ḳhud to wuh jāntā thā ki kyā karegā.)

Filippus ne jawāb diyā, “Agar har ek ko sirf thoṛā-sā mile to bhī chāndī ke 200 sikke kāfī nahīn hoñge.”

Phir Shamāun Patras kā bhāi Andriyās bol uṭhā, “Yahān ek laṛkā hai jis ke pās jau kī pāñch roṭiyāñ aur do machhliyāñ haiñ. Magar itne logoñ meñ yih kyā haiñ!”

Īsā ne kahā, “Logoñ ko biṭhā do.” Us jagah bahut ghās thī. Chunāñche sab baiṭh gae. (Sirf mardoñ kī tādād 5,000 thī.) Īsā ne roṭiyāñ lekar shukrguzārī kī duā kī aur unheñ baiṭhe hue logoñ meñ taq̄sīm karwāyā. Yahī kuchh us ne machhliyoñ ke sāth bhī kiyā. Aur sab ne

jī bharkar roṭī khāī. Jab sab ser ho gae to Īsā ne shāgirdoñ ko batāyā, “Ab bache hue ṭukre jamā karo tāki kuchh zāyā na ho jāe.” Jab unhoñ ne bachā huā khānā ikaṭṭhā kiyā to jau kī pāñch roṭiyon ke ṭukron se bārah ṭokre bhar gae.

Jab logoñ ne Īsā ko yih ilāhī nishān dikhāte dekhā to unhoñ ne kahā, “Yaqīnan yih wuhī nabī hai jise duniyā meñ ānā thā.” Īsā ko mālūm huā ki wuh ākar use zabardastī bādshāh banānā chāhte haiñ, islie wuh dubārā un se alag hokar akelā hī kisī pahār par chaṛh gayā.

Shām ko shāgird jhīl ke pās gae aur kashtī par sawār hokar jhīl ke pār shahr Kafarnahūm ke lie rawānā hue. Andherā ho chukā thā aur Īsā ab tak un ke pās wāpas nahīn āyā thā. Tez hawā ke bāis jhīl meñ lahreñ uṭhne lagīñ. Kashtī ko khete khete shāgird chār yā pāñch kilometer kā safr tay kar chuke the ki achānak

Īsā nazar āyā. Wuh pānī par chaltā huā kashtī kī taraf barh rahā thā. Shāgird dahshatzadā ho gae. Lekin us ne un se kahā, “Main hī hūn. Ḳhauf na karo.” Wuh use kashtī meñ biṭhāne par āmādā hue. Aur kashtī usī lamhe us jagah pahuñch gai jahāñ wuh jānā chāhte the.